



DURANGALDEKO IKERLARI GAZTEEN SARIA 2025-2026

OINARRIAK

1. Xedea eta diru laguntzaren helburua

Deialdi honek ikerlari gazteei zuzendutako Gerediaga Elkarteen lehiaketa arautzea du helburu.

Lehiaketa honen helburua Durangaldeko ondarea, historia, kultura eta gizartearen zaintza, ikerketa eta zabalpenarekiko zaletasuna eskualdeko gazteen artean bultzatzea da. Horretarako, euskarazko ikerketa, sormen eta dibulgazio lanak sustatu eta ezagutzera emango dira.

2. Lehiaketan aurkeztu daitezkeen lanak

Bakarkako lana edo talde lana izan daiteke. Lanen bat taldean aurkezten bada, taldeak pertsona bakarra aukeratuko du taldearen ordezkari.

Eskatzaile bakoitzak proiektu bakarra aurkez dezake.

Deialdira aurkezterakoan **kontuan izan**:

- Gaia: Durangaldean edo Durangaldeko edozein udalerritan kokatuta, edozein jakintza-arlotako ikerketa, sormen edo dibulgazio lana izan daiteke: historia, gizarte, kultura, hizkuntza, ekonomia, ondarea, lurraldea, turismoa, musika...
- Euskaraz izango da.
- Lana jatorrizkoa izan behar da. Adimen artifiziala kontsultetarako soilik erabili ahal izango da, inola ere ez testuen erredakzioa edo itzulpena egiteko. Ezinbestekoa izango da adimen artifizialaren edozein erabilera aitortzea eta zitatzea, gutxienez baliatutako tresna eta agindua (prompt-a) adieraziz.
- Eskatzailea, edo eskatzaile taldeko kide bat gutxienez, Durangaldean jaio, bizi edo ikastea ezinbesteko baldintza izango da.
- Zuzenean edo zeharka giza eskubideak urratzen dituen edozein proposamen kanpoan utziko da.

Aurkeztuko diren lanak **4 formatu eta baldintza** hauetan izan ahalko dira:

- Artikulua: 2.000-4.000 berba.
- Poster akademikoa: 52 cm x 86 cm.
- Ikus-entzunezkoa: 4-8 minutu artean.
- Podcasta: 10-20 minutu artean.

Kategoria bakarra egongo da:

- 35 urte artekoak (1991an edo geroago jaiotakoak).

Taldeen kasuan, ez da beharrezkoa kide guztiak aipatutako urte artekoak izatea, baina bai gehiengoa. Adin-tartetik kanpo gelditzen diren taldekideek, gehienez ere, urtebetez gainditu dezakete erreferentziazko adin-tartea.

3. Lehiaketaren zenbatekoa

Saria: 1.500 €.

Epaimahaiak aurkeztutako proiektuen artean nahikoa kalitate ez dagoela ikusiko balu, saria ez ematea erabaki dezake.

4. Proiektua nola aurkeztu: baldintzak, epeak eta modua eta aurkeztu beharreko dokumentazioa

Proiektuak aurkezteko epea deialdia egiten den egun berean hasi eta 2026ko ekainaren 14ra arte luzatuko da. Proiektuak posta elektronikoz bidaliko dira gerediaga@gerediaga.eus helbidean.

Eskabidearekin batera aurkeztu beharreko dokumentazioa:

- Harremanetarako datuak: izen-abizenak, telefono zenbaki bat eta helbide elektronikoa.
- Ikerketa edo sormen lana bera.
- Eskatzailearen NANaren fotokopia, eta taldeen kasuan, ordezkariaren NANA eta taldekideen izen-abizenak eta jaiotza-urteak.

Eskatzaileak eginiko eskabideak akatsak balitu, horiek zuzentzeko 5 eguneko epea emango zaio, jakinarazpena bidaltzen denetik.

5. Balorazio irizpideak

Balorazioa egiteko orduan, honako irizpideak hartuko dira kontuan:

- Proiektuaren kalitatea.
- Gaitasun berritzailea eta originaltasuna.

6. Epaimahaia eta jarraipen batzordea

Epaimahaia 3 kidez osatuta egongo da, Gerediaga Elkarteak izendatutakoak, Durangaldekoak eta gazteak.

Oinarrien interpretazioaren harira, sor daitekeen edozein zalantza, epaimahaiak argituko du. Proposamena egiterakoan edozein zalantza, idatziz bidali eta idatziz erantzungo da gerediaga@gerediaga.eus helbidean.

7. Ebazpena eta jakinarazpena

Bidalitako eskariak aztertu ondoren, epaimahaiak lan bakarra aukeratuko du.

Epaimahaiak hartutako erabakiaren kontra ez da egongo alegaziorik aurkezteko aukerarik.

Jakinarazpen prozesua sinpleago, azkarrago eta errazagoa izateko, erabakia telefonoz edo emaniko posta elektronikoan jakinaraziko zaie eskatzaileei. Irabazleek sariari uko egin ahal izango diote.

Lehiaketaren irabazlea prentsa bidez ere jakinaraziko da ondorengo datetan.

8. Sariaren ordainketa

Sari-banaketa egunean, irabazleari, edo talde irabazleen kasuan taldeko ordezkariari, banku transferentzia bidez emango zaio saria.

Saria jasotzeko ezinbestekoa izango da sari-banaketan parte hartzea.

9. Lanaren zabalkundea

Deialdi honetan parte hartzeak, eskatzaileak honako zabalkunde baldintzak onartzen dituela esan nahi du:

- Gerediagak, onura gabeko asmoz, edozein formatutan (paperean edo digitalean) argitara ditzake saritutako lanak.
- Gerediagak saritutako lanen irudiak erabil ditzake, zabalkunderako webgune, sare sozial edo argitalpenetan, beti ere, lanaren jabetza aipatuz.

Aurkeztutako proiektuaren jabetza intelektualari buruzko erreklamaziorik egongo balitz, proiektua aurkeztu duen pertsona izango da horren erantzule.

10. Datuen babesa

Europako Parlamentuko eta Kontseiluko (UE) 2016/679 Araudian, 2016ko apirilaren 7koan, jasotakoarekin bat, lehiaketara proposamena aurkeztuta Gerediaga Elkarteari emandako datuak tratatzeko baimen informatua, berariazkoa, librea eta agerikoa ematen zaio, Pribatutasun Politika onartuz.

Datu hauei indarrean dagoen legearen segurtasun neurriak, neurri teknikoak eta antolakuntza neurriak aplikatzen zaizkie. Ez zaie daturik utziko hirugarrenei, legeak agindu ezean.

Datuen tratamendu arduraduna: Gerediaga Elkartea. NIF zenbakia: G48113153., Egoitza soziala: Larrasoloeta 3, 48200 Durango. Kontaktuko posta elektronikoa: gerediaga@gerediaga.eus

11. Oinarrien onarpena

Eskabidea aurkezteak esan nahi du berariaz eta formalki onartzen direla lehiaketa honen oinarrietan zehaztutako baldintzak.